

最上大乘金剛大教寶王經

宋朝散大夫試鴻臚卿明教大師法天奉詔譯



清刻龍藏佛說法變相圖

最上大乘金剛大教寶王經卷上

下同臨三

宋朝散大夫試鴻臚卿明教大師法天奉詔譯

如是我聞一時世尊在廣嚴城菴羅樹園與
大苾芻衆六十萬人俱其名曰尊者大迦葉
尊者優樓頻螺迦葉尊者那提迦葉尊者須
菩提尊者尊者那尊者大目乾連尊者舍利弗
尊者劫賓那尊者摩訶捺囉尊者優波梨尊
者阿難如是等苾芻衆六十萬人俱復有菩
薩摩訶薩其名曰師子威德菩薩摩訶薩地
藏菩薩摩訶薩虛空藏菩薩摩訶薩普賢菩
薩摩訶薩金剛手菩薩摩訶薩除蓋障菩薩
摩訶薩觀自在菩薩摩訶薩妙吉祥菩薩摩
訶薩寶星菩薩摩訶薩鉢訥摩俱母那菩薩
摩訶薩常堅固身菩薩摩訶薩寶嚴海悲菩
薩摩訶薩清淨妙音聲菩薩摩訶薩燈光明

菩薩摩訶薩得妙音聲菩薩摩訶薩如意光明菩薩摩訶薩徧徃世界如師子行菩薩摩訶薩清淨無垢金光明菩薩摩訶薩善威儀善行菩薩摩訶薩從地涌持世王菩薩摩訶薩天言說堅固音聲菩薩摩訶薩得一切法自在菩薩摩訶薩慈氏菩薩摩訶薩如是等菩薩摩訶薩六百萬人俱爾時世尊從於口中放大光明其光是耀過於日月而有衆色所謂青色黃色白色紅色綠色有如是等無數種種色光照於無量無邊世界乃至梵世如是照已還從世尊頂門而入爾時尊者阿難即從座起偏袒右肩右膝著地合掌恭敬白佛言世尊如來放光非無因緣世尊今日放大光明何因何緣唯願如來應正等覺大慈廣覆爲我等說爾時世尊告阿難言如汝

所說非無因緣汝當諦聽吾當爲汝廣分別說阿難今有無量無邊衆生得證無生法忍乃至得涅槃界由是因緣放斯光明說是語時有一天子名印捺囉部帝領四兵衆及持種種供養之具來詣佛所至佛所已持諸供具恭敬供養禮佛雙足住立一面作是思惟我今欲聞甚深之法復以頭面禮世尊足右膝著地合掌恭敬而白佛言如薄伽梵三界大師乃是一切衆生之父我如小兒愚癡無慧復無方便又如盲人多於瞋恚唯願世尊哀愍於我云何方便令我諸根於諸境界當使獲得無生法忍爾時世尊讚彼王言善哉善哉知汝所問爲於當來末法衆生欲令彼等得無生忍於是世尊告大王言我有四種最上之法若有聞者必當獲得無生法忍爾

時阿難在大眾中得聞是語即前禮佛合掌
白言世尊云何名爲四種之法佛言四種法
者所謂聲聞乘緣覺乘此二乘者但能自利
不能利他復有二乘謂方廣大乘及彼最上
金剛大乘是名爲四爾時阿難又復問言是
金剛大乘當云何性佛言阿難若有菩薩發
於最上大菩提心是即名爲金剛乘性是菩
提心能自利益復利於他如是菩薩摩訶薩
行解於方便能於諸根各各境界所緣所作
當獲無生法忍爾時彼王印捺離部帝得聞
世尊爲於阿難說於四法甚大歡喜次白佛
言世尊云何菩薩摩訶薩解於方便能於諸
根各各境界所緣所作得無生忍佛言大王
乃往過去無量無邊不可思議大劫之前時
世有佛出興於世號曰清淨光明如來應供

正等覺明行足善逝世間解無上士調御丈
夫天人師佛世尊彼佛世界名大妙香是日
清淨光明如來壽量住九萬劫彼佛世界所
有衆生智慧猛利皆悉發於大菩提心時世
有王名精進授力如輪王領四兵衆前後導
從詣彼佛所復持種種香華奉獻彼佛伸供
養已作禮旋遶胡跪合掌白言世尊云何能
令諸根境界所緣所作當得無生法忍佛言
大王所有過去未來及與現在諸佛世尊皆
亦說此方便解於諸根各各境界所緣所作
而能獲得無生法忍時精進授復白佛言云
何菩薩摩訶薩本性佛言菩薩性者即是大
慈大悲大喜大捨而此四法是菩薩性菩薩
樂行如是四法能爲一切衆生使獲無生法
忍爾時日清淨光明如來顧視左邊諸大菩

薩摩訶薩告金剛手菩薩言金剛手汝可往彼精進授王宮中如王所問金剛大乘汝當爲王及隨衆生種種根性演說菩薩摩訶薩行於方便使令獲得無生法忍金剛手菩薩聞佛告勅即從座起偏袒右肩右膝著地合掌向佛作如是言我今當承如來聖旨行往度脫時精進授王聞佛告語即向金剛手菩薩前頭面作禮而伸請曰唯願菩薩遵奉佛勅愍察志誠往詣我宮爲我演說金剛大乘使我開解證無生忍亦令當來一切衆生獲大利益時金剛手默然王知許已即整四兵前後導從即與菩薩同乘還宮及設傘蓋幢旛香華妓樂供養菩薩是時王城名曰最上城中人民聞菩薩來於所經路競以香華供養菩薩既至宮已精進授王復設七寶師子

之座請菩薩坐奉獻種種金銀珍寶及以寶瓶盛滿闍伽上妙香水及以五種供養奉上菩薩復有衆多苾芻之衆爲欲聞法亦持香華來獻菩薩時金剛手菩薩即如從佛所聞法式入大曼拏羅以金剛淨水與王灌頂精進授王得灌頂已復有諸苾芻衆及諸刹帝利婆羅門毗舍首陀等皆悉來詣王宮至菩薩所爲欲聞法發菩提心入金剛乘時金剛手菩薩即便爲說菩薩摩訶薩行及諸根法種相及尼陀那方便等乃至如來部金剛部寶部蓮華部羯磨部依金剛乘相應及三摩地三摩鉢底等方便皆令得解盡涅槃界爾時南印度王精進授是王深信敬重樂求最上法入金剛大乘又復樂求隨衆生根性相應三摩地三摩鉢底解於方便獲無生忍盡

注槃界復有北印度王名尾哩野縛哩摩亦如是東印度王名妙臂亦如是西印度王名百臂亦如是復有百千苾芻共持衆寶上妙衣服同時來詣菩薩之所供養恭敬作禮旋繞白菩薩言我等深心樂求最上金剛大乘亦復樂求隨衆生性相應三摩地三摩鉢底解諸方便證無生忍盡涅槃界是時復有國中人民之衆見聞隨喜之者亦皆發起大菩提心時世復有衆多金剛阿闍梨所謂覺龍覺授法龍賢授德授海授如是等阿闍梨得聞菩薩所說相應之法皆悉證得無生法忍爾時東印度王妙臂與中宮后妃嬪嬙姝女乃至城中人民樂法之衆而於根本最上法中三摩地相應之法而得成就隱沒自在是印度中復有諸金剛阿闍梨所謂賢軍德軍

寂靜軍烏多羅軍無邊藏天藏善力藏等復有諸婆羅門所謂捺多婆羅門訶哩三謨婆羅門奔荼利迦婆羅門鉢訥摩婆羅門如是等阿闍梨婆羅門等得聞菩薩所說金剛大乘及相應三摩地法皆悉獲得無生法忍時西印度王百臂及彼中宮后妃姝女等聞菩薩所說甚深金剛大乘及諸法要皆悉證得金剛智所攝相應三摩地成就法及隱沒自在彼印度中復有衆多金剛阿闍梨所謂智蜜善蜜賢蜜慧蜜賢無垢賢等亦有諸毗舍所謂善意毗舍印捺囉波毗舍印捺囉囉毗舍淨光毗舍等是阿闍梨及毗舍等得聞菩薩所說最上金剛大乘及諸妙法皆悉證得無生法忍北印度王尾哩野縛哩摩與中宮后妃姝女等及諸人民沙門婆羅門等樂

入金剛大乘者於是法中得聞菩薩演說法
要亦於金剛智所攝真實相應三摩地成就
及隱沒自在爾時金剛手菩薩爲彼諸王及
沙門婆羅門乃至毗舍等於六年中演說金
剛大乘及諸法要使彼諸王及樂法之衆志
獲利樂又復演說諸成就法謂八大聖藥眼
藥劒鬚索金剛輪金剛杵寶瓶華屣等及入
脩羅窟乃至敬愛諸成就法時諸王及一切
沙門婆羅門等而常隨逐聽受教導爾時金
剛手菩薩告彼衆言今彼處有^七大名山號摩
呬捺囉其山頂上平正廣闊亦有園苑池沼
適悅之所汝等諸王及沙門婆羅門毗舍首
陀等所有修學金剛大乘皆可同往彼山修
習而住後於異時忽告衆曰彼日清淨光明
如來應正等覺將入涅槃汝等今可與我同

至佛所求受灌頂時修習金剛大乘諸會衆
等即與菩薩共持種種殊妙香華往詣日清
淨光明如來之所既至彼已奉上香華作大
供養旋繞讚歎頭面著地禮佛雙足修敬畢
已共坐佛前爾時金剛手菩薩於衆會前偏
袒右肩右膝著地金剛合掌安自心上白世
尊言我承如來教勅往彼王宮爲諸王等及
沙門婆羅門乃至一切發菩提心求學金剛
大乘者即爲演說金剛大乘及於諸根境界
所緣所作種種之法皆令獲得無生法忍世
尊我今欲於如來金剛大乘法中與彼學衆
求受灌頂唯願如來慈悲聽許爾時日清淨
光明如來左右顧視已即於口中放大光明
其光五色於剎那間照於恒河沙等諸佛剎
土上至梵世悉皆照耀如是照已尋復旋還

却從世尊口中而入時彼光明所照佛刹一切如來悉皆稱讚作如是言彼金剛大乘即攝一切乘乃至過去未來現在亦復如是彼金剛大乘即攝一切乘時彼學衆即於金剛大乘悉得灌頂得灌頂已咸以頭面禮世尊日清淨光明如來及金剛手菩薩足復繞千匝歡喜讚歎各還本處爾時日清淨光明如來於後不久入般涅槃佛涅槃後法住千歲時金剛手菩薩復往摩訶捺囉山中安住時一切金剛大乘學衆互相謂言我等本師菩薩還止彼山我等宜應同往彼山奉事供養及自修習金剛大乘一切事業時彼學衆一切沙門婆羅門等各持香華及諸供具即同往詣摩訶捺囉山金剛手菩薩所至彼山已各各奉上海華寶玩供養菩薩旋繞禮拜聽

仰而住於是菩薩見彼學衆咸來山中親近供養修習事業志意堅固即告衆曰汝等各各於我最上金剛大乘聞諸法要悉皆證得無生法忍盡涅槃界汝等諦聽我師日清淨光明如來已入涅槃衆生薄福無所恃怙我所告汝汝善導行佛入滅後彼金剛阿闍梨是汝等師何以故彼阿闍梨而能護持佛刹復能護持金剛祕密法故能說四字名此即是如來相汝等大衆當於彼師常加尊重禮拜供養同於佛想即感一切如來常加擁護即是見前一切如來汝等學衆常於彼師奉事供給凡所受用坐卧等具衣服湯藥一切所須無令闕少雖常侍近不得足蹋師影所有同學無分親疎一心平等善男子若有學人及諸人等於金剛阿闍梨及金剛大乘諸

學衆等生不信心發起惡念復加毀謗是人
果報當墮地獄畜生及諸惡趣何以故以一
切諸法從彼生故若有毀者是即毀法故獲
是報若有衆生未斷輪迴來求學者當隨根
性爲他演說金剛大乘當令得入金剛三昧
金剛手菩薩又復告言此金剛大乘即是一
切如來一切如來即是大智汝等學衆若有
不依三時違我教者令汝破壞由如灰燼於
是菩薩即以金剛水與學衆等飲復結大忿
怒印安著學衆頂上作加被已又復告言佛
子汝今此身即爲金剛三昧所持若有違犯
不依從者以我金剛三昧印及忿怒印令彼
破壞又復菩薩即如先佛法式爲諸學衆授
於灌頂復誦警覺真言令其覺悟又復示與
金剛杵自稱已名與諸弟子身分八處而作

加被時金剛大乘學衆於菩薩所受學一切
法式畢已即向菩薩種種稱讚恭敬供養謝
彼菩薩又復白言我等各各如菩薩教於金
剛阿闍梨所承事供養恭敬讚歎一如聖旨
爾時金剛手菩薩摩訶薩化事畢已即於彼
處隱沒不現

最上大乘金剛大教寶王經卷上

最上大乘金剛大教寶王經卷下

宋朝散大夫試鴻臚卿明教大師法天奉詔譯

爾時世尊復告印捺囉部帝大王言大王汝於往昔過去無量阿僧祇大劫之前日清淨光明如來法中已曾爲王號精進授汝於是時與諸學衆於彼佛處已曾求學金剛大乘及諸法要汝今於此娑訶世界我釋迦牟尼佛所又復求學如是金剛大乘時印捺囉部帝聞此語已即復合掌白世尊言云何名爲菩薩摩訶薩佛言若有樂行大慈大悲大喜大捨是即名爲菩薩摩訶薩爾時世尊說是語已顧視左邊告金剛手菩薩言汝可同彼過去劫前日清淨光明如來之時爲印捺囉部帝大王說金剛大乘及說菩薩摩訶薩行諸根境界等種種之法方便令解使獲無生

卷三

十

法忍時金剛手菩薩摩訶薩即從座起偏袒右肩頭面著地禮世尊足已合掌當心而白佛言我今當承如來教勅而爲演說印捺囉部帝聞是語已身毛喜豎心大欣躍即從座起禮世尊足已復禮金剛手菩薩足禮已白言唯願菩薩遵奉佛勅往詣我宮爲我演說爾時金剛手菩薩承佛教勅又復觀彼印捺囉部帝身心虔切默然許之印捺囉部帝知默許已即禮金剛手菩薩足歡喜踊躍禮佛而退即整四兵前後導從乃與菩薩同乘寶車及張傘蓋動種種樂尊敬供養還歸曼誡羅補覽大城於其城中菩薩所經之路一切人民各以香華奉獻供養既至宮已時印捺囉部帝預嚴七寶大師子座菩薩下車即升彼座王及宮中后妃眷屬復設種種香華珍

寶及殊妙衣作大供養復以寶瓶盛滿闍伽香水奉上菩薩爾時金剛手菩薩摩訶薩即如從佛所聞金剛大乘秘密相應三摩地三摩鉢底種種諸法廣爲演說欲令王等證無生忍盡涅槃界是時復有衆多沙門婆羅門刹帝利毗舍首陀等亦來王宮爲欲聽聞金剛大乘及諸妙法又有東印度摩羅嚩國法光大王北印度無能勝王西印度月光大王摩伽陀國頻婆娑羅王舍衛國波斯匿王梨蹉尾國梵授王等復有無數沙門婆羅門刹帝利毗舍首陀及無數發菩提心衆生欲聞法故亦來王宮如是人等各於菩薩信重歡喜來至王宮如是人等各深信歡喜踊銳白金剛手菩薩言我等樂入金剛大乘及欲聽聞種種妙法於是金剛手菩薩而於六年

爲於諸王及諸人衆演說金剛大乘諸菩薩行及無數百千俱胝相應三摩地三摩鉢底乃至於諸境界所緣所作一切諸法廣爲演說爾時印捺囉部帝得聞法故於一切如來相應法中證三摩地三摩鉢底得無生忍盡涅槃界及得隱沒自在乃至中宮后妃眷屬國內民庶得聞金剛大乘及諸法要皆悉證得無生法忍國中復有金剛阿闍梨所謂善龍義龍寶聲戒聲發光聲復有婆羅門所謂法龍力賢等得於金剛大乘法中證無生忍盡涅槃界彼東印度摩羅嚩國發光大王於最上金剛大乘法中悟得最上根本相應法得無生忍盡涅槃界及得隱身自在乃至中宮后妃眷屬國中士庶得聞金剛大乘及諸妙法皆悉證得無生法忍盡涅槃界彼印度

中復有金剛阿闍梨名曰賢天如來天善天
又有刹帝利耶輸嚩哩摩彌嚩哩摩等亦
於金剛大乘法中得聞法故悉皆證得無生
法忍盡涅槃界復有北印度無能勝王得聞
金剛大乘及諸法要乃於真實攝教中證得
相應三摩地得無生法忍盡涅槃界及得隱
身自在亦有中宮眷屬后妃嬪嬙乃至士庶
得聞金剛大乘一切妙法皆悉證得無生法
忍彼印度中亦有金剛阿闍梨名曰賢喜蓮
喜又有刹帝利名曰烏那野嚩哩摩及有毗
舍名曰法密如是等衆於金剛大乘得聞法
故皆悉證得無生法忍盡涅槃界復有西印
度月光大王於金剛大乘聞諸法故證得金
剛口相應三摩地等得無生忍盡涅槃界及
得隱身自在亦有中宮后妃嫔女乃至士庶

等又有金剛阿闍梨名曰不空成就普成就
如來成就等又有刹帝利名曰善密及蘇哩
野嚩哩摩如是衆等於金剛大乘聞妙法故
皆悉證得無生法忍盡涅槃界爾時金剛手
菩薩摩訶薩爲彼諸王及一切學衆演說金
剛大乘一切諸法又復演說八種成就之法
所謂聖藥眼藥華屣劍絹索金剛輪金剛杵
及寶瓶等成就之法又復演說入地入脩羅
窟成就之法又復演說菩薩摩訶薩依金剛
大乘所行之行諸根境界所緣所作種種之
法令彼學衆各各修習離於懈怠時金剛手
菩薩於六年中爲諸王等及求學金剛大乘
一切學衆以種種方便譬喻言辭演說諸法
各各令證悟已即告衆曰汝等當知今彼處
有大名山號乞乞那其山頂上平正廣闊亦

有林樹池沼適悅之地我今先往汝等入金剛大乘諸王沙門婆羅門毗舍首陀一切學衆亦可於彼俱往集會是時學衆於彼山頂皆集會已金剛手菩薩即復告言今者世尊釋迦牟尼將入涅槃汝等今可與我同至佛所求受灌頂爾時學衆即與金剛手菩薩同離彼山是時諸王將理四兵前後導從及備種種諸大供養往世尊所爾時世尊釋迦牟尼已在拘尸那城金剛手菩薩摩訶薩與諸學衆至佛所已設大供養奉獻世尊右繞三匝禮拜讚歎於佛前坐時金剛手菩薩即從座起偏袒右肩右膝著地作金剛合掌白世尊言我奉佛勅以菩薩摩訶薩行於金剛大乘法中爲學衆說於諸根境界所緣所作及種種諸法各各證悟或得三摩地三摩鉢底

或得法忍盡涅槃界或得隱身自在世尊我已如是說法利益今來佛所欲爲彼衆於如來處求受灌頂爾時世尊左右顧視已即於頂門放五色光其光晃耀於一刹那間照如恒沙佛刹上至梵世如是照已尋復旋還却從世尊頂門而入爾時十方光所照處一切如來異口讚言金剛大乘即攝一切乘乃至過去未來及與現在一切諸佛皆說如是金剛大乘攝一切乘爾時世尊即以金剛水與一切金剛大乘學衆灌頂諸學衆等得灌頂已皆用頭面著地禮世尊足及禮金剛手菩薩足禮已讚歎踊躍繞百千匝各還本處爾時尊者阿難白佛言世尊如是正法當云何名云何受持佛言阿難今此正法名爲最上大乘寶王如是受持爾時如來應正等覺釋

迦牟尼說是經已即於拘尸那城入般涅槃
金剛手菩薩於後却還乞乞那山亦有衆多
菩薩聲聞同來山中時金剛學衆互相謂言
我等本師金剛手菩薩摩訶薩却復乞乞那
山我等宜應亦往彼山親近供養是諸學衆
各持種種香華寶玩同往彼山到彼山已各
以香華奉上供養禮拜旋繞恭敬讚歎各一
面坐爾時菩薩觀視會衆沙門婆羅門刹帝
利毗舍首陀等已即復告言汝等學衆諦聽
汝已各各於此金剛大乘悉得證悟皆是得
金剛大乘法者汝等當知佛涅槃後金剛阿
闍梨是汝等師亦如往昔無量劫前日清淨
光明如來出世之時彼大妙香佛刹中有王
名精進授彼時我亦如是說承事金剛阿闍
梨軌則今亦復說弟子承事金剛阿闍梨軌

三

十五

則承事之則乃有八種時印捺羅部帝白金
剛手菩薩言云何名爲八種承事之則金剛
手言一者不得呼師名字二者常自稱師足
三者與師執持鞋履四者掃灑房地五者爲
師敷置牀座六者五體作禮七者不侵害師
八者指授稟信是名弟子承事金剛阿闍梨
八法彼阿闍梨以此八事觀察弟子以日累
月積月成歲若彼弟子於此八事無有違背
專心不退阿闍梨然可攝受爾時金剛手菩
薩又復告言譬如世間蟲蛆飛蛾之類皆從
緣生墮斯惡趣何由出離亦如世間輪迴衆
生云何轉業得無生滅若不因從金剛阿闍
梨攝受爲說種種妙法何由能除一切煩惱
證於寂滅得不退轉大王彼金剛阿闍梨先
當觀察所攝弟子行相貴賤等乃可付與二

諦之法王言云何名爲二諦菩薩告言一者
真諦二者俗諦王言何名真諦菩薩告言所
謂內空外空內外空空大空勝義空有爲
空無爲空畢竟空無際空無變異空本性空
一切法空無所有空無性空自性空自相空
無性自性空大王是十八空者乃名真諦大
王復言云何名諦菩薩告言若於此十八空
知非常非無常是故名諦何以故謂不見內
空不見外空不見內外空不見空空不見大
空不見勝義空不見有爲空不見無爲空不
見畢竟空不見無際空不見無變異空不見
本性空不見一切法空不見無性空不見自
性空不見自相空不見無所有空亦不見無
性自性空於如是空不見二相中亦不可得
非生非滅非縛非脫非行非住非明非暗非

法三

十六

實非虛非輪迴非涅槃亦不增亦不減我說
如是種種皆離身口意是則名爲真諦大王
復言云何名爲俗諦謂以四無量心於威儀
本相五蘊四界六入五境行往三界是即名
爲俗諦王復問言更復何名真諦菩薩告言
彼種種色相如幻化如陽焰如水中月如水
上泡如鏡中像如夢如電如乾闥婆城乃至
虹霓等若於色相得如是見是則名爲真諦
若於如是諸法受行不離苦行乃能證佛得
一切智大王乃至徧六俱胝文字之義亦無
二無分別一切如來皆如是說彼智金剛教
汝已悉聞是等皆名真諦大王若於二諦不
能如實觀察了知雖專修習經無量劫唐捐
其功終不能到大智彼岸而此二諦乃是一
切如來之所歸命爲父爲母爲寂靜住及爲

涅槃爲阿吠嚩哩帝迦爲正徧知覺一切三摩地爲精妙普門三摩地乃有如是等種種功德大王彼一切金剛大乘學衆必須專心揀選如法弟子乃可爲說如是二諦是二諦法難可得聞雖彼緣覺聲聞亦難得聞何況

第三

十七

外道等爾時印捺囉部帝與金剛大乘學衆得聞是說悉以頭面禮謝菩薩時印捺囉部帝復白菩薩言揀選弟子當有何相菩薩告言有四種弟子有五補特伽羅王言四種弟子當云何說我今樂聞菩薩告言第一佛乘第二初乘第三初學菩薩行第四諸菩薩摩訶薩行此名弟子四種之相云何分別如是之相菩薩告言彼得安然非謗非信於真言印相一一曉了證於佛乘於意云何譬如盲者得人引導由得佛乘證解脫故弟子初依

師學得一俗諦初相應法入三摩地未能了知顯密二教亦未知二諦十二因緣亦未知般若波羅蜜是名弟子初修習相王言云何菩薩五種補特伽羅菩薩言所謂囉怛曩補特伽羅贊捺囉補特伽羅鉢訥摩補特伽羅奔拏哩迦補特伽羅烏怛鉢攞補特伽羅是等於聞信戒施悉能具行爲烏波薩迦王言菩薩此之名相云何分別菩薩告言於一切法雖得聽聞而於少時皆悉忘失此名烏怛鉢攞補特伽羅若於祕密之法雖有所聞不能爲他分別演說譬如軍尼內藏明珠而不顯現此名奔拏哩迦補特伽羅或得信心大悲心聞法開解如竹無節受持通達此名鉢訥摩補特伽羅凡聞法義咸存我見譬如擊鼓空有其聲以有我見不能利他此名贊捺

羅補特伽羅是四烏波薩迦而能一向專心
求一切法信心受持住金剛乘復次心性猛
利多聞持戒一切能捨了知真實凡所說法
能隨根機是名羅怛曩補特伽羅此一烏波
薩迦常能爲諸弟子說種種法時金剛阿闍
梨如是選擇弟子若得清淨殊勝如法弟子
乃可傳付祕密大乘一切勝義當令修習不
斷聖種印捺羅部帝又復問言云何分別祕
密大乘菩薩告言彼瑜伽顯密二教曼拏羅
有二十種皆悉得名祕密大乘我今略說灌
頂曼拏羅次第授灌頂阿闍梨欲作灌頂法
先自結淨選揀勝處安曼拏羅位後令弟子
結淨已然阿闍梨加持五色線五色粉餅地
結界作曼拏羅安布賢聖位復加持闍伽瓶
安方位已然請召賢聖依位坐畢即獻香華

闍伽等然可引弟子入曼拏羅與授灌頂弟
子得灌頂已即持種種香華珍寶奉獻阿闍
梨弟子此後即是入金剛大乘處灌頂位當
於自己身口意業深加省察若能了達是名
五燈若不了達當名五暗復次分布火壇次
第所有使用種種之物先備播帝哩宰嚕縛
等及所鋪座吉祥草及護摩柴其柴當用清
潤樹枝及五穀酥等或作護摩先燒祭火天
然作護摩觀於火炎色相形像及聲香等若
得吉祥是法成就若不吉祥是不成就其請
召賢聖入曼拏羅及獻闍伽次第諸式大略
相同凡所有法皆從金剛大乘祕密流出所
有三瑜伽五烏補捺伽多或六俱胝文字義
或說法成就義或決定義或說本行尼陀那
方便因等如是所說或四種或五種或七種

或十二種種不定皆不離二諦復次說四密所謂密教密義密語密句若於四密無差所作成就或遇九執七曜諸惡星宿及諸毒等持誦密句皆可大息或求敬愛或作增益或作降伏若爲人及四足多足無足等或降伏諸惡大部多夜叉乃至惡人等並可降伏若不降伏必當破壞親愛分離或有一切禁縛邪明一切破壞或有怨家興兵欲來侵害自然退散或爲大旱必能降雨如是種種一切所求持念密句悉得成就隨心如意凡持誦密句作金剛語音無令斷絕必滿所願王言云何名爲菩薩禪定菩薩告言禪定有種種持誦亦種種若知祕密句即是知禪定祕密者爲所誦文句具足及知印相若如是者有大威力是則白法和祕密者即攝真實理

猶如虛空體寂靜故解於世法能顯真理乃於印相觀想密句文義所作斷疑此持誦者乃名爲賢如是行人凡有見者皆如佛等彼人禪者不見密句不見印相不見賢聖想諸字輪體同鏡像王復問言云何菩薩三摩地菩薩言彼菩提心及智慧方便乃至三明及無等等此皆是菩薩三摩地又復觀自本身及真言印相賢聖形像一切莊嚴皆如虛空寂靜是菩薩三摩地菩薩入如是三摩地是名安住二諦爾時金剛手菩薩摩訶薩爲印捺羅部帝及諸刹帝利一切入金剛大乘學衆說如是種種法已即依法作曼拏羅與王等及諸學衆授於灌頂彼諸學衆得灌頂已異口同聲各各白菩薩言我等稟教奉事金剛阿闍梨一如聖旨是學衆等於金剛手菩

薩摩訶薩供養恭敬種種言辭伸讚謝已爾
時會中諸大菩薩及聲聞天人阿蘇囉譏嚕
拏彥達嚩緊囊囉一切大衆聞菩薩說是經
已歡喜信受作禮而退金剛手菩薩即於山
中隱沒不現

最上大乘金剛大教寶王經卷下

音釋

闕加梵語也此云賓賓齋賓嬪毗賓切嬪良
絹古法切從所綺切燼徐刀切銳俞芮切并
補庚切繩直也